



Berg m—

IOELIS PRO-
PHETAE CONCIO DE
PERSECUTIONE, POPULI
IUDÆICI, ET DE VERA POENI-
TENTIA.

Carmine comprehensa,

IOHANNES STIGELIO

autore.

Eiusdem Stigelij PRECACIONVM
Liber primus.

ESAIÆ XXX.

Cum conuersus ingemueris, tunc saluaberis.

GENAE

M. D. L. V.

H. Meine.

H. G.

i 653,

3. Stig.

STIGELIVS

Sic Pater ex animo sobolis qui crimina deflet,
Quem dolor offensum, quem simul ira mouet,
Et noxæ meritam damnando indicare pœnam,
Et leni miseris mente fauere solet ;
Vt facit, austeri scripto accusante loelis,
Et ueniam pariter corda docente, DEVS.
Qui sapis, admonitus uitam emendare memento,
Et confide Deo, sic tibi mitis erit.
At quem cæca iuuat, culpæq; ignara uoluntas,
Exicium proprio triste furore feret.

ILLVSTRISSI

MO AC GENEROSISSI

MO PRINCIPI, AC DOMI

no, Domino Iohanni Friderico III. Du

ci Saxoniae, Landgrauio Thuringiae,

Marggrauio Misniae,

Principi suo & Domi

no clementissi

mo.

IOHANNES STIGELIVS

S. P. D.



Ommunis querela est omnium ho-
minum, de ærumnis & miseriis uitæ humanæ, usur-
pata omnibus temporibus, etiam iis hominibus, qui
opinionē sapientiæ magni ac præclari sunt habiti, ut
uel Tragœdiæ declarant, quod genus scriptionum in
id uidetur esse inuentum, ut ob oculos ponat perpe-
tuum lamentationes generis humani, cum tristissimis
casibus atq; ærumnis consistant. Et quidem ipsa uita humana quid est aliud
quam perpetua Tragœdia, in qua feruent miseriæ, ardent dolores, gliscunt
gemitus, & perstrepunt querelæ. Intueamur circulum actionum humana-
rum, continuum occurreret spectaculum horrendæ confusionis. Fremunt Reges
tumultuantur Principes, furit populus. hoc lugubre exercitium bellis, & a-
pimis, cædibus, ui doloq; publicè & priuatim peragitur, peragendi exitus
calamitate & miseria continetur. In hac mundi Tragœdia, iactatur cæcius

A ij

iste

iste exiguus & obscurus, ac neglectus, recte agnoscentium & celebrantium Deum, qui quoniam in speciem deformis est, nec melius habet quam reliqua multitudo, imo etiam prius, uehementer offendit politicorum hominum animos, qui dum causas calamitatum non intelligunt, feruntur & ipsi communi errore atq; culpa, ut & sinistre iudicent, de cursu uitæ humanæ, & præpositerè uitam agant, nec agnoscant sua delicta, nec indignationis & quærelarum modum inueniant, non alieni à uulgi & plebis insania. Ita fertur equus auriga, neq; audit currius habenas. Ac mirum est, uidere diuersissimas errorum quasi nebulas ac monstrosas imagines, dum alius fortunam & casum, alius necessitatem, nescio quam, alius ipsam diuinam providentiam accusat, & quasi in ius uocat, causas calamitatum à se procul amoueri, & quasi proficisci opinatus, dum in id, quod proxime succurrit stulte cogitationi, deriuare suas sordes, sua scelera atq; delicta conatur. Ex hac opinione Græcis est usurpatum hoc. Fortunam esse iniquam propinatricem generi humano, quæ unum alicui bonū propinans, semper affundit tria mala. Quis autem ferat seruulum istum necessitate excusantem sua scelera. Fato peccauit, Nemo sit fato nocens. Sed eorum maxima est & execrabilis insania, qui Deum ipsum malorum autorem audent dicere, qualem in Aegistho uel Homerus depingit sapientissimè declarans ueras causas miseriæ humanæ, ex ipsa hominum uoluntate proficisci. Quid igitur? nonne uel Ethnici Poetæ commonescatione, potius peccatum deplorandum esse fatebimur, quam ipsas calamitates? siquidem omnis causa miseriæ humanæ ex delicto nascitur hominum, nec quisquam est, qui sibi ipsi non sit auctor fortunæ suæ, si ad originem contingentium in hac uita respiciamus. Quod cum ita sit, consideremus quæso causas malorum, propiusq; animo, quasi collustremus fontes miseriarum, uis enim cognitis, & mitigatio & remedium rectius peti atq; comparari poterit. Sciendum igitur est, ex uno fonte promanare calamitates omnes, quæ in genus humanum redundant, ex quo scaturit peccatum hominis, quod est in mente horrenda confusio & cecitas, & in uoluntate execrabilis auersio à Deo, & in corde uagus & contra ordinem sceleratè ruens impeius. Hoc uenenum contumaciæ aduersus Deum, cum à Diabolo inspiratum sit primis parentibus generis humani, & contagiosa labe propagatum in posteros, non modo regnat in homine auctoritate quadam originis suæ imperiosa, sed etiam augetur omni momento

mento ac cumulatur uoluntariis delictis. Quocirca iustissimo ordine constitutum est, ut qui mala faciat, uicissim mala perferat, utq; ærumnæ generis humani nihil sint aliud, quam pœnæ delictorum. Omnium igitur malorum in uita humana, siue sint ἀτυχεῖα, ut Mors, morbi, pestis, fames: siue ἐκδοῖα, ut bella, cedes, rapinæ, damna, una & principalis causa est peccatum, hoc est, humanæ uoluntatis præpostera actio & contumacia aduersus Deum. In uoluit autem his malis tam pios quam impios homines, immota Dei iusticia, ut illis sint Πόνησσις, his uero τιμωγὴ. Nam quia multis de causis subiecta cruci est Ecclesia, uult Deus & iram suam, & iusticiam, etiam ex ærumnis piorum conspici, ut animi agnoscant peccati magnitudinem, & in timore Dei perseuerent, aut hallucinati atq; lapsi, dolore culpæ suæ, & agnitione iusticiæ diuinæ, rursum erigantur ac resipiscant. Ita in uniuersum affligitur genus humanum, omnibus hominibus causam malorum præbente peccato, quo contaminati sunt omnes, ipso tamen ordine iusticiæ diuinæ disciplinam proponente resipiscenibus, contumacibus uero & obduratis pœnas, ut calamitatum omnium finis sit ac meta, disciplina & pœna. Sicut enim uoluntantur in omni genere uitiorum, homines dissoluti & impii, ita pœnas etiam sibi accersunt, cum modo delictorum congruentes, qui uero lapsus suos atq; errores agnoscunt, ij pœnarum exemplis erudiuntur, ut occasionem uitent delinquendi, & rationem incant uiuendi sanctius, ideo sentiunt consolationes in ærumnis, & tolerant aduersa fortius, & in periculis liberantur, ut Psal. inquit. Multæ afflictiones iustorum, sed ex omnibus his liberat eos Dominus. Et alio in Psalmo, Spiritus sanctus idem discrimen afflictionum describens, familiari imagine Patrisfamilias pingit Deum, ueluti in medio stantem, manuq; tenentem calicem afflictionum, ex quo pii bibant florem & puriorum succum, impii uero exhauriant feces in fundo subsidentes. Iam si quæris, quæ mitigatio, quodue remedium in tanto turbine malorum operari miseris possit, ad prophetarum conciones animum reuoca, qui si mul & causas calamitatum monstrant, & modum auertendi eas præscribunt. Quid igitur illi? num fremere, ringi, stomachari, num lamentari, se arrire frontem, fodere genas, lacerare uestes, num deniq; docent mitigationes, consolationesq; in rebus aduersis, ab ulla potius ratione peti posse, quàm ab emendatione factorum, uitæq; correctione scelerate atq; turpiter actæ.

Profecto culpam iubent agnoscere, totoq; pectore exhorrescere atq; resor-
midare peccatum, iustumq; odium uero Zelo conuersionis, ad Deum suscipe-
re, aduersus naturæ humanæ morbos, aduersus contumacis uoluntatis prauas
inclinationes, confugere ad misericordiam Dei per filium ipsius: peccere ef-
fracto atq; subactio corde remissionem delictorum, opem, præsidium, tol-
erantiam: uacare legitimæ functioni & officio: constantem esse in confesio-
ne. Ita sane malorum omnium Δελητηρόν & ἀλεξήτῃον proponunt, pœ-
nitentiam & fidem. Atq; hæc duo cum peculiari studio uariè & copiosè do-
ceant Prophetæ omnes, unus Ioel præ cæteris angusto & breui scripto, ita
plene atq; integrè tradit, ut nihil possit exactius atq; perfectius, nihil me-
liori ordine tradi ac doceri. Intuenti uero mihi in hæc nostra tempora, qui-
bus adeo omnis disciplina pietasq; collapsa est, ut nisi concione pœniten-
tiæ coherceantur ac refrenentur hominum animi, nihil expectari præter in-
teritum possit, uisum est multum consolationis ex grauissima concione Icelis
proficisci posse in usum uitæ humanæ, si eius oratio ex angustia breuitatis
explicata, & illustrata carmine, potentius feriret hominum aures, animosa
que non modo grauitate commoueret, sed etiam suauitate inuitaret. Itaque
uox eius, latino in sermone, numeris est à me instructa, & animata uersibus,
ita tamen, ut quantum fieri potuit, sensui uis sua atq; integritas sit relicta.
Mouit me ad hoc institutum etiam similitudo horum temporum, quorum idem
in Ecclesia propemodum status est, qui fuit concionante Ioel, ante serui-
tutem Babylonicam. Etsi enim quo tempore is uixerit certo statui non po-
test, quidam enim sub Manassè, quidam sub Sedechia, eius tempus assignant,
Tamen ex circumstantiis satis adparet cum tunc floruisse, cum peruersitas
populi Iudaici ad summum aucta, intensq; ampliata suit, & impendens in-
stitit pœna impietatis, maturante Numine diuino furorem hostis Babylonicus.
Conqueritur Ioel de magnitudine delictorum, & de perturbatione Status re-
ligionis, ac monet fore, nisi resipiscant homines, ut impressione hostis om-
nia subuertantur, Quid aliud nostro tempore deplorandum omnibus plius
est, dum non modo foris impendet uastatio Ecclesiæ, Sed dñi etiam & in
ipso Ecclesiæ corpore, tot scellæ oriuntur indies, absurdissime de summa
cultus diuini disceptantes? Quid aliud expectandum porro est in uniuersum
quam hostium potentissimorum incursiones, qui iam tum non obscure glori-
antur

antur sibi ob nostra delicta uires augeri, & ampliari successus. Quid quod cō-
atrociora sunt delicta omnis generis, quo mundi etas magis inclinat ad finem?
Germaniam profecto adeo quædam flagitia obruerunt, quædam inuasunt
nuper, ut pertimescendum sit, ne periclitanti paulo post, nullus locus saluti
relinquatur. Quam enim fœdum est usuræ crimen, quæ uelut lepra quædã con-
tagiosissima, adeo irrupit in omnes ordines hominum, adeo perfidiose ac flagi-
tiose exercetur, in urbibus, atq; agris, apud infimos, medios, & summos homi-
nes, ut passim nihil aliud contractus & cōmercia re uera dici possint, quam mu-
tuæ corrosiones & deglutiones, omnium neruorum, omnium uirium commu-
nis patriæ? Quantum sceleris est in Ebrietate? cuius fœditatem & pœnas
meritas, loc etiam deplorat. At hæc apud Germanos ita sibi fixit atq; fulciuit
fedem, ita omnium animos ac sensus occupauit, ut nihil sit moribus nostris &
temporibus altius infixum, nihil usitatus, nihil familiaris, nihil extermini-
nari possit ægrius, adeo ut qui conuersationes, societates, conuiuia inspece-
rit, nimis uere possit usurpare uulgatum istud. Hic nihil est aliud uiuere,
quam bibere. At quanta uiciorum ac scelerum monstra, ex belluationibus ex-
pullent quotidie, lateq; ac longe sobolescant ac propagentur, quis hominum
ignorat? Venio ad crimen quod in peierandi & execrandi furore occupatum,
abusu nominis diuini horribiliter delinquit, adeo contaminatum blasphemia,
ut mirum non sit, ob hoc solum peccatum descendere catarrhas cœli, in per-
niciem humani generis. Quid illud uero, quo limphata atq; fascinata Germa-
na luentus, insanientium more discurret ad nundinationes istas flagitiosæ
militiæ, & effrænæ ostentationis, qua nunc geruntur bella, ignauie, rapi-
nis, furtis, libidini, ac sexcentis aliis sceleribus, uel ex professo operam
dans, ad ipsa opera militiæ, imparatior atq; ineptior, quam ulla potest esse
fœmina, id quod sane nouo uestitus genere proficitur, caligarum, amplitu-
dine sinus inflatissimi, laciniisq; diffiuentibus ad pedes usq; dependentiū, qua
forma procul dubio Diabolus sese circumscribens infœlici Germaniæ ostentat,
atq; iactat, exultans de successu imperii sui, cui se adeo familiariter addi-
cunt & dedunt Germani isti mulierosi milites. Hoc genus hominum, quoni-
am ocio torpet, & luxu diffiuit, cumulat auxit contagia libidinum, dum
eos imitati impii mercatores, & in ocio degeneres filij familias, solum egre-
gium ducunt, quidquid militari exemplo uidetur fieri. Hinc concubinæ & pel-

lices, pessimo exemplo ali coeperunt à multis, præsertim in urbibus, quæ
habent emporia, & in agris apud eos, qui nobilitatem sibi uendicant. deri-
uatum est hoc uenenum sparsissimum Diaboli instinctu, in statum etiam ser-
uilem, utriusq; sexus, fœdumq; dictu est, quanta sit petulantia, salacitasq;
eorum hominum, qui in famuliciis uersantur. Frustra autem hic clamantibus,
& in uiam reuocantibus Ecclesiæ Doctoribus, magnopere dolendum est, Ma-
gistratus alibi surdos alibi mutos esse, alibi consulto connuere ad delicta, ni-
mirum ubi & ipsi simili labe aspersi, aut etiam contaminati sunt. Neglecta
igitur uoce piorum Doctorum, in tanta socordia atq; ignauia Principum, ex
rebus etiam inanimatis producit Deus Concionatores Doctoresq; pœnitenti-
æ, portentis cœlo terraq; futuras calamitates humano generi denuncianti-
bus. Vidimus ex aqua limpida etulientem sanguinem, motu Siphonico, colore
sandiceo, stupore prope ipsius Naturæ loci, de quo nulla potest concipi su-
spicio, uel decolorationis ex terrestri contagione ortæ, uel eiaculationis ui-
olenter ex imo uiso in altum protrudentis bullas aquæ coloratæ. Quid de
portento dicam, quod Nebre accidit? parturientem mulierculam, ex eodem
loco, ex quo partus expectabatur, eiaculatam esse flammam, & uelut ignitos
globoſos cum boarum sonitu, & fœdo sulphuris ac nitri odore, adurentes &
brachia & ora tum obstetricis, tum cæterarum muliercularum, quæ ut opem
ferrent parturienti, adfuerunt. Quis simile quiddam unquam uel legendo uel
audiendo cognouit? Prætereo in ære conspecta ostenta multorum generum,
ut in hac uicinia, Acynacis Getici figuram, & alibi pugnaſtes Cataphrattos,
alibi militem armatura insignem, sed absq; capite, reliquo corporis trunco,
& motis brachijs insultanti similem. Horribiliora tamen sunt, quæ in aliis
ditionibus, præstigijs tum demortuorum tum uiuentium, adhuc hominum, con-
specta sunt simulacra, allato interim nuncio, eas imagines mendaces & falsas
fuisse. Quid quod Luporum immani specie discurrentium, hominesq; arre-
ptos uexantium imagines, uicinia ad Hieram fluium, etiam grauiſsimorum
hominum testimonio, nuper, & tantum non hoc quoq; momento conspicata
est. Sunt hæc dira, & uere portenta, atq; nuncia horribilium & seditio-
num, & incurſionum externarum, quorum utrumq; si & consilia quæ agi-
tantur domi, & conatum impetumq; Tyrannorum, qui foris impendet, con-
siderabimus, in foribus planè, atq; supra caput esse nobis intelligemus. Er-

go cum aliis nunquam magis, quam hoc ipso tempore necessarium fuerit pœ-
nitentiæ remediũ, conatus sum quasi in scenam fabulæ mundanæ producere
Ioelcm, carmine loquentem, Doctorem pœnitentiæ grauissimum, pariq;
ardore ac studio flagrantem, tum in exaggeranda ira diuina, tum in illu-
stranda gratia ac misericordia. Nam & sensus scripti huius, ita cogitatione
informatus est atq; absolutus, ita institutus est ordo, ut liquido appareat,
Spiritus sanctum uoluisse hoc Oraculo locis extare Epithomen totius doctri-
næ de uoluntate Dei, cupientis per unicum filium suum agnosci & celebrari,
omnibusq; per hunc solum condonari peccata, & imputari iusticiam ac gra-
tiam, qui hoc beneficium in filio Dei uera pœnitentia agnoscant, & fide ad-
prebensum firmiter teneant. Hæc ipsa doctrina, locis conuicione continetur,
duobus capitibus comprehensa, pœnitentia nimirum, & remissione peccato-
rum. Ideo filium Dei ornat proprio Epitheto, Doctorem iusticiæ cum nomi-
nans, & in renouatione hominis describit Spiritus sancti officia & opera, &
ut semel omnia dicam, Catechesin proponit Christianæ doctrinæ, optimo or-
dine suauissime comprehensam, dum primum explicat doctrinam de pœniten-
tia, Deinde ad Christum digitum intendens, eius regnum & beneficia descri-
bit, Mox Spiritus sancti dona commemorat, gentium quoq; uocationem præ-
dicat, & consolatur Ecclesiam dulcibus & salutaribus sententiis. Quoniam
uero hunc Catechismi & ueræ pœnitentiæ Doctorem, presidio potentis a-
licuius atq; magni patroni munitum, exire in uulgus decebat, tum quod no-
uum genus orationis sonaret, tum quod Christi beneficium celebraret aper-
tius, quam tolerare Antichristi satellites possunt. Tuae Celsitudini, Illustriss.
Princeps, cum dedicare uolui, ut quoniam tua uere Heroica & generosa indo-
les optimum Principem nobis spondet, tuo nomine protectum hunc uatem
multi libentius perlegant. Iam pridem enim de te amplissimam spem omnibus
bonis mentibus longe lateq; concepit, & ingenii felicitas, & amor pietas
ac uirtutis, & studium summum modestiæ ac disciplinæ. Proinde & meri-
to tibi tene precatur Patria; tui maxime obseruans atq; amans, & tuis quo-
que moribus letatur, cum & patris tui, & aui, præstantissimorum Principum
exemplo, compertum habeat, eam rempublicam mirabiliter regi atq; conser-
uari etiam in mediis periculis, quæ a bonis atq; piis Principibus gubernatur.
Ingens est consolatio, Deum conseruaturum esse eos, singulari prouidentia
& cura

et cura, qui fouent Ecclesiam, et benefaciunt ceteri Deum uerè inuocanti, sicut testantur historie Adam, Nohe, Abraham, Iacob, et similes. Ideo et te, Fratresq; tuos Illustrissimos, utcunq; cadant impiorum consilia, sub umbra alarum suarum, ut Psal. loquitur, imo sub umbraculo Ecclesie sue, quod uerus est Christus, teget, custodiet, fouebit, conseruabit, quoniam uobis cordi atq; curae est, ut ita florentem doctrinam Euangelice ueritatis propagetis ad posteros, sicut eam accepistis à parente uestro, cuius hoc decus, hæc gloria propria est, quod in maximis periculis constitutus, incomparabili exemplo constantie, doctrinam fidei in filium Dei, purè ac integrè suâ confessione conseruatam, in gloriam Dei, exultanti Ecclesie electæ asscruit. Cum autem omnium nostrum sit officium, qui sub clientela uestra uiuimus, hoc ingens decus grato ac pio animo agnoscere, orandus est Deus, ut ad uestrum exemplum, ad uestras leges ac constitutiones, populos uestros amore iusticie, æquitatis, pietatis accendat, ut in omni conuersatione ciuili uitæ, honestas et grauitas uiuendi cum professione Fidei Christianæ respondeat. Quod ut faxit Deus, ex animo uota facio, et sincere precor. Bene uale Princeps Deo et Musis iampridem dilectissime. Datæ Ienæ ex Salana. Die castorum Angelorum. Anno salutis M. D. LV.

ELEGIA DE EFFICACIA FIDEI CHRISTIANAE.

IN dubio pugnans dum mens discrimine quærit
Sit ne ipsi curæ, sit ne relictæ Deo.
Iamq; Deus lucem uerbi subducit, & aufert,
Iam reddit, uarias continuatq; uices,
Et de more patris timida cum prole iocantis
Cor tremere ambigua speq; metuq; facit,
Non alia est ratio, contra quæ uiribus armet,
Quam ualida supplex uox repetita fide.
Me licet occidas, tua sum, tua dicar oportet
Per gnatum soboles morte redempta tuum,
Verus in hoc uitam mihi præsidiumq; dedisti,
Promissi nequunt fallere pacta tui,
Fons ut es immoti, uirtus ut uiuida ueri,
Sic oris nescit fallere lingua tui.
Omnia ut opponas, fidei te robore uincam,
Sæpius hac etiam uictus es ante Deus.
Hæc ubi non dubio depromi pectore sensit,
Incipit ad pugnam segnior esse Deus.
Et quasi iam uictus fidentis robore cedit,
Credere mihi, hæc mihi est unica grata Deo.
Sic pugnante fauens cedit Cumanitæ Christus
Et firmam pleno prædicit ore fidem,
Dixerat huic, canis es, turpe est, nec more receptum,
Erepto pueris pascere pane eanes,
Illa sed ardenti fidei certamine pugnans
Strinxit in aduersas reddita tela minas,
Ecce micæ etiam trito de pane Catelli
Copia quas mensæ spargit herilis, edunt.
Sim canis, at liceat passim fragmenta catellis
Debita, quærenti sumere Christus cani.

Huic

Huic Deus adplaudans, tua me fiducia uincit
Fiat, ut ex animo conscia credis, ait.
Sic quicumque malis, quicumque doloribus aget
Difficili certam tempore poscis opem,
Exue quod mentem uiciat, precibusq; profundis.
Non dubiam casto pectore iunge fidem.
Inde Deo quamuis duro, constanter adhere,
Fidentem nescit deseruisse Deus.
Ipse fidem firmat, nutu iuuat ipse uolentem,
Quodq; queat uinci, præcipit ipse modum.
Nonne uides paruo de semine surgere plantam
Que sepe ingentes tollit adulta comas?
Sic crescit teneræ surgens fiducia menti,
Dum Deus adflatu cor fouet ipse suo.
Ergo Deum precibus superare asucce, fideq;
Non alia iratus uincitur arte Deus.

PSAL. LXXV.

Afflictis calicem diuina potentia præbet,
Qui tristi feruet semper amaricæ,
At quibus à Christi patiens spes sanguine pendet
E summo latices purius orbe bibunt.
Exorbet ipsa tetros cum fece liquores,
Est quibus æternus nomen inane Deus.

ESAIAE I.

Vestra licet superent ipsum delicta ruborem
Purpura quem cocco tincta madente refert,
Ambre tamen dulci diuinæ sparsa salutis,
Sitbonia fient candidiora nix.

CONCIO

CONCIIO HELIS PROPHE TAE DE PERSECUTIONIBVS PO- PULI IYDAICI, ET VERA POENITEN- TIA.

*Praedicat uastationem regni Iudaici per regem Babylonie
eum, & captiuitatem Babylonicam, hortatur ad poenitentiam
& fidem; Vaticinatur de aduentu & regno Messiae, de missione
Spiritus sancti, de uocatione Gentium, & consolatur Ecclesiam
salutaribus sententiis.*

HAEC patefacta Dei diuino oracula flatu,
Gratia uatidico sonat inspirata Ioeli,
Dum populo suadet peruersum linquere morem
Viuendi, & fontem neglectae aperire salutis
Nititur, auersos terrens formidine poenae,
Inuitansq; iterum coelestis amore parentis.
Namq; docens animos delicti agnoscere culpam
Atq; odio sceleris uitam emendare nocentem,
Et ueniam sperare fide, tali incipit ore.

Audiat haec, aetas curuae uicina senectae,
Quam docuit canis prudentia plenior annis,
Audiat hanc, late quisquis colit incola terram,

B

Explore

ἐπιγὰρ.

Propositio.

Attentio.

Explore animis, si tempore talia vestro,
Euenere unquam, si tale quid atra uetustas,
Et series proauorum, illisque profundior ætas
Commemorare potest. Vestris hæc pandite natis,
Et natis natorum, & qui nascentur ab illis.

ἡγήματα κα-
lamitatum.

Si quid adhuc agris, si quid pallentibus hortis
Germina depascens intactum eruca reliquit,
Id folijs hærens squalenti corpore Bruchus
Demetit absorbens: iam si quid & ille terendo
Præterijt, populum quod spe lactauit inani,
Id populatrices late absumpsere cicadæ
Exicium facto quæ frugibus agmine densæ
Ferre solent, totis & spem subuertere campis.
Denique quod pastis potuit superesse cicadis
Aeris id uicium sub sole ardente peremit;
Hinc erugo terens, illinc pede noxia campe.

ἀποστροφῇ
πρὸς τοὺς ἀ-
σώτους καὶ ἡ-
καλύπτους
qui causam ca-
lamitatus
præbent
pœnis.

Vos quibus est moris, nimio brutescere luxu,
Et posito certare mero, uiresque bibendo
Atterere, exciti damnosum rumpite somnum,
Et uestrum lugete scelus, persoluite pœnas.
Omnis enim extincto uastata est uinea fructu.
Irrita deficiunt frustratas pocula fauces.

Namque leonino grassator dente superbus
Pene carens numero, qui robore pollet & armis,
In mea præcipiti populus uineta furore
Irruit, atque ipsas abolet cum palmitæ uites.

Ille

Ille etiam insignes horti spectacula ficus
Stringit, & omne decus ramis pallentibus aufert.

Qui genus Ifacidis numeras à sanguine Iudæ,
Plange uelut uirgo, quæ pullo tristis amictu
Ob casum sponsi lachrimis indulget acerbum.

Squalent luctifonæ sacris cessantibus aræ,
Nemo dapēs libat, pateris aut dona meraci
Accumulat laticis, non thure altaria fumant,
Omnis honos templis postq̃ est ereptus, & ipsi
Ex adytis Domini pietas sublata recessit,
Triste sacerdotes lugent & pectora plangunt.

Aret ager, squalent uastati iugera campi,
Interiere pari frumenta & pabula fato,
Triste rigent oleæ, uites lugubriter albent,
Absorbent gemitu mœsti sua fata coloni,
Et lugent steriles sine succo & uiribus agros.
Ipse per extremos dum longe respicit antes
Vinitor, infausti lachrimis spem funerat anni.
Obriguere comæ citrijs, nec palma uirenti
Affurgit ramo, nec deniq̃ pristinus ullis
Arboribus decor ullus inest, verum omnibus una est
Mœstitiæ facies, luctus color omnibus idem.
Cur ita? namq̃ homines quidquid gaudere solebant,
Id subito in duros abiit ferale dolores.

O quicunq̃ Deum sacram celebratis ad aram
Ite sacerdotes, deiectos cingite lumbos,

B ij

Exercete

Prima pars
pœnitentiæ,
Contritio &
dolor. Exag-
gerat autem
magnitudinē
Calamitatum,
ut magis im-
pellat ad dolo-
rem.

Hypotyposis
augendi dolo-
ris causa.

*Per proſopo-
peian modum
etiam & for-
mam lugendi
preſcribit ut
nihil omitat
quod ad incu-
tiendum ani-
mis dolorem
pertineat.*

Exercete animo iuſtas plangente querelas.

Deſeruere ſacras pateræ cum lancibus aras,

Vera Dei ex adyto templi doctrina receſſit.

Sobria ieiunis indicite feſta diebus,

Sic tempus lugubre monet. Subducite uentri,

Vt menti ſit ſana quies, cum plebe uocati

Templa petant caſtiq; ſenes, patiẽſq; iuuentus,

Atq; humiles tali deplorent uoce dolorem.

Venit ſumma dies, & lamentabile tempus,

Qua Deus hanc ſtatuit poenĩs adfligere gentem,

Quas meruit. ceu pernicies pernicipibus aliſ

Irruit atra dies Domini, quem cuncta verentur.

Illa etiam ex oculis alimenta erepta uidentis

Aufferet, et diro conſumet corpora tabo.

Aufferet illa etiam quidquid præſente ſalutis

Lætitiaq; Deo tulimus, dum pace beati

Tranquilla tegimur templi florentis in umbra.

Reſpicite ærumnas, pridem tellure ſub ipſa

Aruit omne ſolum, uacuis ſtant horrea tectis,

Spes omnis quoniam decepti euauit agri.

Ipſa etiam ingentem mugitu armenta dolorem

Edere, & ad cœlum ceu triſte gementia cernas,

Exiciũ penè ore loqui, fatumq; uereri.

Ore boues tetro, quia ſelliſ pabula deſunt,

Eſuriem oſtendunt, & oues lugubre ſonantes

Aeris e uicio contagia morbida ducunt,

Te tas

Quam truculenti equites , quantoq; fragore feruntur?
Per iuga ferratis ut quondam agitata cathenis
Plaustra sonant late, quæ fortè viator ut audit,
Linqvitur aut animo, fugiens aut ima iacentis
Antra petit uallis: flammæ uelut igne furentes
In stipulas abeunt, fumo et crepitante coruscant.
Sic fertur quacuncq; uenit, sæuissimus hostis,
Cum strepitu sonitucq; ruens, fortissimus armis
Omnibus instructus, quæ dira ad prælia spectant,
Inq; ipso properans meditatur prælia cursu.
Quale solet terris irato numine fulmen
Incudere horrorem , cum nubis siccus aquosæ
Halitus accendit fumos , atq; alite uento
Laxior, undoso perrumpit nubila tractu.
It sonitu fragor, et celsas a uertice turres
Concutit, aut rupem luctanti a monte reuellit.
Non uis hunc etiam cunctantior incitat hostem.

*Nebucadnezzar
rem intelligit.*

Illius ad nomen populis per sicca uagatur
Ossa pauor , trepidant humiles , animiq; rigore
Attoniti pallent. ut quondam testa tenacis
Argillæ, tepida quam fumus contigit aura.
Ipsos iam uideas magnis conatibus hostes
More Gigantæo in summos contendere muros
Intrepido uultu: pro se rem quisq; gerendo
Magnanimus , metuensq; nihil, iusto ordine pugnat
Inruet, & forti miscebit prælia dextra.

Non

Non alijs alijs obstabunt, labor omnibus idem
 Et uirtus eadem belli, & commune periculum,
 Per medios gladios immunes uulneris ibunt.
 Hostibus haud tergo, sed forti pectore noti,
 Urbis inoptatam pars cum uictore ruinam
 Ex altis lustrabit equis, pars moenia lusu
 Infiliet, ruptis aut furum more fenestris
 Illapsa, e spolijs prædam cumulabit opimis.
 Eloquar hoc etiam: tantus furor incitat hostem,
 Ut metus in populo putet ipso pondere terram
 Contremere, & moto luxari cardine coelum,
 Orbari solem radijs, & lumine lunam,
 Offundiq; astris nebulas. Nam qui omnia cernit
 Ccelorum dominus, grassantis conscia fati
 Fulmina præmittet, quacunq; exercitus ibit
 Iste Dei nutu tantis sæuissimus ausis,
 Iussus obire Dei mandata, & pellere noxam.
 Vsq; adeo est horrenda dies, & plena tremoris,
 Qua Deus inuadit fontes, Quis perferat illum?
 At bonus & mitis coelo dominator ab alto
 Ad ueniam inuitans miseros, sic excitat ultro.
 O quicunq; male poenam accelerastis agendo,
 Polluti scelere, & peruersæ crimine vitæ,
 Exuite ingenium, prauos desuescite mores,
 Inq; uiam reuocate gradus, & pectore toto
 Auerſi a uicijs, culpaq; doloribus ægri

Encl. p. Excidii
 Nam urbs de-
 repta est, tem-
 plum concre-
 matum, ciuitas
 capta, rex ex-
 cecatus, & cū
 populo capti-
 uis inferuit
 tē abductus. 4.
 Reg. ultim.

Altera pars
 poenitentiae,
 ardens inuoca-
 tio & firma
 fiducia.

Et uen

Et ueris lachrimis, ad me conuertite mentes.

Sic agite, et melius rebus sperate malignis.
Conscia mordaci conscindite corda dolore,
Ne uestes lacerate, quid hoc de more soletis
Nil solitum prodesse? Deum sed quaerite uestrum
Conuersi, quoniam is mitis, largusq; fauoris,
Ad ueniam pronus, iustam quoq; tardus ad iram.
Qui quoties hominum plagas delicta merentur
Ipse dolet poenis, iusta quas irrogat ira.
Quis scit an irato melior sententia mentem
Vertet, ut effusi monumenta relinquat amoris,
Præteriens, sanctis quo cultus purior aris
Et uacuis apti templis reddantur honores,
Quos uelit ipse libens, patrioq; agnoscat amore?

Sicut ante lu-
am & dolo-
ris, ita nunc for-
ma inuocatio-
nis & fiducia
prescribit, tam-
quam certum mo-
dum amolien-
di impenden-
tes poenas.

Ergo tubæ sonitu, mœstam lustrate Sionem
Atq; omnem noto compellite carmine plebem,
Ieiunos sacrate dies, in templa frequentes
Coueniant, doctiq; senes, docilisq; Iuuentus,
Et matrum reuerenda cohors. genibusq; uoluti
Ante Deum, dedant diuinis obuia rebus
Pectora, et accepti præstent pia munia cultus,
Intenti precibus. nec te noue sponse moretur
Lætitiæ spes cepta tux, nec gloria sponsam,
Qua fruitur, retrahat, nec cura domestica quenq;
Separet a coetu. tum fida silentia sacris
Præstanti populo, patrio de more sacerdos

Mente

Mente preces casta recitet, gemitetq; monendo.

Omnipotens aeternae Deus, qui illustribus olim
Indicijs, uiui patefactus imagine uerbi,
Te patrem miseris docuisti uelle uocari,
Vnde etiam humanos diuinum semen in artus
Mente tua genitum confidimus adfore, ut omnem
Auferat a nobis culpae cum crimine labem.
Parce tuo populo, nec quos dignatus es ipse
Haereditas dixisse tuos, perimite pudendis
Affligi exemplis, aut turpi occumbere casu.
Degenere miserate Pater culpamq; dolentes,
Et cupidos renouari, & missum Heroa uereri,
Amisam nobis qui restaurare salutem
Iam uenit, & uindex placide sese omnibus offert.
Cur patiari Deus, gentes, quas nominis hostes
Esse tui nosti, iactare haec sputa loquendi?
Ecce ubi nunc Deus est, simulatum numen eorum?

Sic ubi uos humiles gemitu delicta fateri
Senserit omnipotens, ac toto pectore uitae
Emendare nephas: & amore accensus & ira
Insurget, curamq; suae geret impiger arcis,
Quam posuit, populos nec dura mente relinquet,
Quos odisse nequit: Sed parcens more parentis,
Subducet poenam, & sortem frenabit acerbam,
Fata etiam retro, maturum urgentia casum,
Insistens aget, atq; ultro solabitur aegros,

C

Forma ardentis
in uocatione
his.

Haec

Hæc ita respondens, saluis confidite rebus
Gens mea, iam uultu accipio pia uota sereno,
Seu uobis cordi est numerosæ copia mellis,
Seu lautæ uis sana meri, seu pinguis oliui
Succus, larga meo nutu feret omnia tellus
Et triticum, & latices dulces, oleiq; liquores,
Spes uestras explebo libens, tectosq; tuebor,
Barbara ne turpi posthac gens probra pudore
Obijciat miseris, quæ ueri est numinis experta.
Quin etiam Arctoa furias ex arce minantem
Excutiam procul, ut nudis illisus arenis
Damnatosq; solo, ne quidquam limina spectet
Auroræ, infœlix, & ad ultima septa uagetur
Oceanî. Illi ater consumet uiscera morbus,
Sordeat obsceno miserum ut fœtore cadauer,
Excessit quoniam metas ingentibus ausis.
Pone metum, & duri fomenta repelle doloris
Gens dilecta mihi, ne te macerato querelis,
Ne desponde animum, sed spe tua damna serena.
Et Deus est audax, & magno ingentiâ motu
Facta patrare potest. Quin uos quibus arida campi
Gleba famem soluit, conceptum armenta dolorem
Ponite. nam si qua est desertis inuia sulcis
Area, nobilibus flauescet rursus aristis.
Dulciaq; herbosæ diffundent gramina ualles.
Quæq; sua passim diffusa sub arbore poma

Specula

Speſtabunt rura, & pingues in uitibus uuas,
In ficu caricas, lato feret ubere tellus.

Iam lætare ſacræ ſoboles electa Sionis,
In domino gaudete Deo, qui mœnia ciues
Arcanæ incolitis Solimæ. Quod namq; ſalutis
Fundamentum vnum, monitis per templa ſonantem
Iuſticiam auditis: quod læto humore cadentes
Siue aurora ſuum renouet, ſiue heſperus ortum,
Excipitis pluuias, & gratæ commoda uitæ:
Ille dat, ille dabit, largo, velut ante, fauore.
Implebit mentes doctrina, & frugibus annum.

Iamq; aderit præſens, pleno quem numine mittam
Iuſtitiam inſigni doctor pietate profeſſus
Mentibus humanis ignotam, namq; docebit
Se ſobolem æterni cælo veniſſe parentis,
Vt veluti largus qui campos irrigat imber,
Eluat ex animis tetræ contagia culpæ.
Is renouata nouis accendens pectora flammis
Quæ recte agnoſcant ueniam, cauſamq; ſalutis,
Conſtituet regnum in terris, & colliget agmen
Colluuiæ ex omni, quod celiſ inferat aſtris,
Omnipotens ſeruator. Erit tunc integer ordo.
Atq; habilis animis ueniet uigor, & decus ingens
Accedet miſeris, vitæ cœleſtis origo.
Aurea tunc vero decurrent ſecula plauſu,
Nec deerit penori victus, nec copia rebus,

C ij

Aeternis

Vaticinium de
aduentu &
regno Chriſti.

Aeternis coniuncta bonis, uitaq; ministra.
Vt pluuia ante diem sulcandos praeprarat agros,
Serior, inuersae maturat semina terrae,
Obuia sic miseris uerae doctrina salutis
Sponte sua obuenerit, quam casto pectora motu
Accipient, largoq; ferent hinc gaudia fructu.
Tunc iterum optatae distendent horrea messes,
Amplior & positis fundet uindemia labris
Pocula, & in mensas large nascentur oliuae.
Ipse autem duris subiectum legibus aeuum
Antiquum exonerans, ingenti mole leuabo,
Et donis saturabo nouis, & amore tuebor.
Ipse annos etiam, meruit quos decolor atas
Quos uariae pestes, insecta, & reptile campi
Exicium, mea tela, mea q; exercitus ira,
Erosere, putri grassantis labe ueneni,
Vberius reddam, & caelo meliore rependam,
Ne quid defuerit, quod laxa annona requirat,
Quo laeti, & memores, uestri celebretis honore
Nomina magna Dei, qui uestri talia causa
Facta stupenda facit. Sic quos semel ipse recepi
Non patiar turpi posthac lugere pudore.
Hoc etiam experti longo memorabitis aeuo
Me medium inter uos, manifesta luce uidendum
Consueuisse hominum caetus lustrare uagantes,
Os habitumq; gerentem hominis, Studioq; docendi

Quaeres

Quærere dignatum alternas & reddere uoces,
Præsentem facie, & meritis: me deniq; solum
Esse Deum uestrum, nec rerum in mole moueri
Vllum aliud numen, quod uota audire piorum
Possit, opem præstans. Sic quos semel ipse recepi
Non patiar turpi posthac lugere pudore.

Hinc ubi præstiterit cari mandata parentis
Iustitiæ sator, humanos dignatus in artus
Demigrare Deus: manifesto munere notus
Ipse mei effundam uiuentem numinis auram
In genus omne hominum, qui me propiore, uocantem
Agnouere animo. Ceu dulci humore solutus
Neglectos fecundat agros largissimus imber,
Sic meus effusus cumulabit pectora donis
Spiritus, instaurans lucemq; decusq; nouando.
Namq; ea uis illi est mecum, atq; æterna potestas,
Eruit ex animo lentum torpente ueternum,
Quo ruit in uetitum morbi secura uoluntas.
Corda leuat uicijs, quæ cæco innata tumultu
Permiscet motus, stimulisq; calentibus urit,
Accenditq; fidem flamma uberiore micantem.
Tum comes assistit cepto, & defensor amori,
Confirmatq; habitum, solatur & erigit ægros,
Conseruat fortes, uiresq; audentibus addit,
Nec finit insidijs, aut turpi occumbere casu.
Hinc uigor immotis animis, infractaq; corda

De missione
Spiritus Sancti
uaticinium ex
pletum in Pen
tecoste, quod
exponit S. Pea
trus Acto. 2^o

Mille per ætumnas , spem circumferre salutis
Victricesq; polo palmas inferre ferendo
Asuevere , decus positæ sublime coronæ
Et lætum æternæ donum referentia uitæ.

Ergo animis haustus paucis , & cognitus oris
Iuda tuis tantum , dum tempora prisca ferebant,
Liberior longis flatus mirabilis alis
Qua populi totum linguis habitusq; per orbem
Mille modis uariant , longinquis uiribus ibit,
Electis sese insinuans , & mille figuris
Expediens dotes , & late munera spargens,
Sic fax parua suæ sub corpore simplice formæ,
Exiguo rutilat motu , mox acta rotatu
Emittens iubar ad metas extendit opacas,
Longius it lumen spaciosam illustre per umbram,
Agnoscent omnes manifesto in lumine lucem.
Hoc duce uestra nouis edet miracula signis
Posteritas , uestra soboles ab origine , puro
Ingenio excutiens sanctorum oracula vatum,
Fœmina masq; simul , senioq; asueta Iuuentus
Fata canent orbi uenturæ præscia vitæ.
Somniaq; exponent , hominum non arte magistra
Euoluenda , animis uerum obrepentia castis
Instinctu angelico , & veri spectantia finem.
Quin etiam simulachra modis ludentia miris
Visa oculis , poterunt sancte enarrare docendo,

Omnia

Omni^{bus} vt monstrent tanti vestigia Regis
Qui recipit miseros, & cœli donat honore.
Deniq; me solum ueriti quicunq; uocabunt
Agnoscentq; Deum, simul hoc spirabile donum
Affundam cupidis. aliquo seu iure fruantur
In genere hoc hominum, seu sorte premantur acerba,
Mancipia, officij nullum discrimen habebo.
Prodigijs etiam cœlo terræq; timendis
Signa dabo, flammâs iaciens, atrumq; cruorem,
Pulla teget facies nigrum ferrugine Solem,
Ore^{q;} sanguineo squalebit Luna, priusquam
Magna dies domini metuendo illuxerit ortu.
Atq; ita stat fixum, quisquis miserantis adorans
Iustificum nomen Domini, fidente uocabit
Pectore nil metuet, Sed casu ereptus ab omni
Ante Deum æterna seruatus luce fruetur.
Nameq; illic miseras statio gratissima mentes
Excipiet portu, & tuto seruabit asilo
Inclita qua spectans rupes tegit alta Sionis
Mœnia. Quin illos pax hæc optata manebit
Quoscunq; externis Deus e regionibus ultro
Accierit, patria bonus & pietate uocarit.

Ista fluens etenim quando aurea ceperit ætas,
Iuerit & largo manans de fonte salutis
Gratia, quæ ueniam conuersis mentibus adfert,
Vincula cum Solimæ, cum dempsero uincula Iudæ,

Capti

*Signa ante
missionem Spi
ritus Sancti, ut
S. Petrus expo
nit.*

*Vocatio genti
um per inuita
tionem et com
minationem.*

Captiuas laqueis animas, & crimine soluens,
 Quicquid erit populi spaciosi longa per orbis
 Climata, quod dura spretam ceruice salutem
 Respuerit, fictis faciens uota impia diuis,
 Vndiq; collecto compellens agmine cogam
 In numerum, atq; manu confertum iure uocabo,
 Conuincamq; reos, ueniamq; dolentibus ultro
 Proponam, miseris si non mens laeua nocebit.
 Tunc populum Iudæ captiuum & vincla gerentem.
 Expediens tristi seruili e carcere Legis
 Alloquio dulci reuocabo in luminis auras,
 Pascit ubi Ambrosia mentes diuina beatas
 Gratia, & electas cœlesti luce serenat.
 Est locus augustæ quo cæco in carcere mentes
 Bella gerunt secum, delicti mole grauatae,
 Cum scelerum seriem motu meliore dolentes
 Agnoscunt gemitu culpam, lateq; sonantes
 Horrescunt poenas, & spe solante timores
 Implorant ueniam: ueluti, si ambagibus imis
 Secessu in longo, qua Iosaphataea vallis
 Arcuat ingressus, horrentiq; imminet umbra,
 Compressi populi stipentur, et vndiq; densi
 Ignarq; uia, ne quidquam exire laborent.
 Huc ego compulsis, quas proprius abstulit error,
 Gentibus, examen statuam, ponamq; tribunal,
 Iusticiamq; meam, mea iura, manumq; potentem
 Ostendam

Vallis Iosaphat
 phat

Vallis Iosaphat, id est, dolor & pavor
 conscientiae in agnitione peccati. Item Iudaeum Spiritus
 & arguentis conscientias.

Ostendam trepidis, & litem sponte mouebo.
Publica iudicij late subsellia ponam,
Iusticiam exercens, non qua uindicta nocentes
Adficit, errorem sed qua solatia fallis
Gratia suppeditat, culpam miserata dolentes.
Attonitæ stabunt gentes. formidine terror
Opprimet erroris memores, & corda pauore
Anxia cura coquet transactæ conscia uitæ.
Tum ueniens censor, diuino numine flatus
Omnipotens, celeriq; uolans in pectora cursu
Agnitione mali, trepidantia corda ciebit,
Arguet & culpam, & mentes reuocabit inertes,
Et cupidus ueniæ. Quos ad meliora uolentes
Vertet amor Recti, ueniam pro crimine vitæ
Gratuito accepti referent, cœloq; fruuntur,
At quibus indomitis furor alto induruit usu
Hos pcena adfliget, consulti criminis ultor.
Hæc peragens simul admissio de crimine uindex
Vlciscar terramq; meam, gentemq; rogatam,
Quam mihi delegi, dilectam ex omnibus vniam.
Hæredem cœli, quam turpibus obruit armis,
Dispersitq; vagam, iactata & sorte retentam
Distribuit, captamq; iugum tolerare coegit,
Obsccenus populus uariorum labe Deorum.
Illum etiam haud puduit floremq; decusq; Iuuentæ
Innocuos pueros, illibatasq; puellas

Permutare mero, & uili diuendere mensa:

Αποσποφί
αί γέντες ἰδο
λάτραι ὅτι ἰμ-
πία ἰμπερία,
quibus minas-
tur poenas.

Dicite cæca Tyrus, & luxu perditæ Sidon,

Atq; alienigenis tellus habitata philistis,

Et quæcuncq; alio similes sub sidere gentes

Viuenti uicium cœlesti opponitis iræ,

Deploratæ animæ, quæ uobis caussa potentem

Irritare Deum: mihi quæ uesania uestros

Reddidit insensos mores: me siccine tetro

Insultu petitis: uindictam & quæritis ægri:

Siccine res miseris præclara et pulchra uidetur

Insultare Deo: turpesq; idola per aras

Susplicere, & uerum studio contemnere Numen,

Et longam immensi telam exercere furoris:

Insultate tamen cursumq; urgete nephandum

Quos iuuat iste furor. Tamen illucescet acerbo

Illa dies miseris nil formidantibus ortu,

Qua simul impietas & deplorata libido

Compensata suo persoluent tempore poenas.

Tunc mala retribuens uestro seruata furori

In caput infligam uobis, quascuncq; merentur

Impia consilia assiduo cum uulnere poenas.

Quid mihi uobiscum rigidi regna impia mundi,

Sentinæ scelerum, quæ longa examina culpæ

Ducitis infandæ, dum passim mille figuris

Ficticios miscere Deos, & uera docentes

• E medio audetis mactando tollere vates:

Pector

Pectoris unde alto mens oblimata veterno
 Nec nouisse Deum, nec rectum agnoscere curat,
 Sed uicijs polluta suis, qua traxerit error
 Defluit, ut prona fluuij cadit alueus vnda:
 Insanæ gentes, & uix miserabile uulgus,
 Vos mea nudastis proprijs altaria donis,
 Argentum atq; aurum, sanctiq; insignia templi
 Impia raptaistis fictorum in fana Deorum:
 Vos sobolem Indæ, Solymiscq; e mœnibus ipsos
 Non estis ueriti captiuos ducere ciues,
 Et procul exilio patrijs a finibus actos
 Exiguo precio leuibus uenundare Graijs.
 Ecce procul positos alio sub fidere, rursus
 Exilio functos meliori sorte reducam
 In patriam, faciamq; uolens, ut uestra uicissim
 Pignora dilectos natos, tenerascq; puellas
 Abductas precio uendat Solimeia pubes,
 Et procul elidens peregrinum mittat in orbem,
 Qua postremus Arabs, cultor foelicis arenæ,
 Inter Erithræos fluctus, & persica stagna
 Respicit umbrarum uacuam sub Sole Syenen,
 Et procul æstiuas geminantem prospicit horas
 Taprobanen, nunquam cui lucida cernitur Arctos.
 Hæc ait omnipotens, fatiscq; hærentia fixit,
 Parcere qui trepidis solet & frenare superbos.
 Audiat hæc, si quem extremis de gentibus ambit

Hæc tēporalis
 pœna expleta
 est, Cyro restituta
 iudeos
 in patriam.

D ij

Orbiuagi

*Amplificatio
comminationis
& inuitatio-
nis per com-
municatjonem*

Orbiuagi finis oceanus, quem sideris expertus
Terra tenet, nimbos ubi parturit humidus Auster,
Quem sicci excubiae coeli, maiorque minorque
Vrsa tegit, radio quem fuscatur vesper anhelus.
Ite ferae gentes, quoniam insanire uoluptas
Est miseris, saeuum de more indicite bellum,
Marte ciete viros, & bellipotentia corda,
Ite uiri fortes, accedite praelia docti,
In gladios uerso cum uomere cedat aratrum,
Et rigidae falces longas conflentur in hastas,
Praetexat vires infirmior, omnia pugnent.
Ipse ego vos forti mansuetus milite victor
Sub iuga pacis agam, densa cum valle coactos
Iudicio explorans, viuaci examine ludex
Expediam vinculis animorum, & luce beabo.
Ibit ouans animis laeti plebs conscia doni,
Iusticiaeque nouae pulchro gaudebit honore,
At incesti incedent peruersa mente rebelles
Et lucem exosi, votis sua funera poscent.

*Apostrophe
ad ministros
uerbi, ut consti-
ter oteant mu-
nus suum &
extrema tem-
poribus lucra
faciant caelo,
conuersas gen-
tes.*

Pergite messorum, promptas immittite falces,
Inuictis audete animis, nec cedite damnis,
Messis adest etenim maturis diues aristis,
Et uinosa madet plenae vindemiae labris.
Iam manus extendenda, frequendandique labores,
Dum tempus ratioque sinit, spesque obuia votis.
Nam ueluti laeto quocies exuberat anno

Ditior

Ditior autumnus, prælis uinaceus humor
Multus abît stagnante lacu, cum se quoq; maior
Larga procul fuso spumat vindemia musto,
Sic scelus humanum exuperans finemq; modumq;
Aestuat, & propria cumulat mole laborat
Ipsa dolens uicij medicinam copta poscit.
Digna lues letho secum miserabile uoluit
Prodigium scelerum, tantæ succurrite culpæ,
Saluifici vates verbi, vigilesq; ministri,
Ingentes armate animos, pugnate docentes,
Errantes reuocate animas, & reddite cælo.

Hinc atq; inde uago densatis agmine turbis
Conuenient populi, & uarijs concursibus acti
Implebunt uallem, verbi clangore sonantem,
Hic ubi decisam dirimet uox ultima caussam
Conuersis ueniam spondens, pugnacibus iram.
Hic sonitus verbi, metam durabit ad ipsam
Decrepiti mundi, & concessi gentibus æui.
Signa etiam ostendet cœli lugubris imago,
Contectum subito tetra caligine Solem,
Atq; intercepto fuscata lumine Lunam,
Vt moueant crudos animos, culpæq; dolentes
Ad ueniam inuitent, posito iam more furendi.
Emitet sonitum dilecta ex arce Sionis
Ipse loquens Deus, ipse uocans errantia corda.
E Solymis ueniet Domini uox missa potentis

*Doctrina de
pœnitentia so-
nabit usq; ad
finem mundi.*

*Summa doctrinae
de Evangelij.*

Quæ fremitu legis, quæ dulci carmine verbi
Omne adeo cœlum cieat. Desuescite mores,
Et labes animorum, & tundite pectora ueris
Erratorum odijs, vitæ melioris amore
Exuite ingenium, a tergo aut tristibus ultrix
Mors aderit, repetens diras pro crimine pœnas,
Exicio æterno. Quin culpæ horrore dolentis
Erigite, atq; animos dulci componite verbo,
Integra quod tritis solatia mentibus offert,
Ante Deum æternæ dona allatura salutis.
Hæc Deus, haud aliquem abijciens delicta dolentem,
Excipiet miseros, & tectos sponte fouebit,
Præsidioq; teget, portusq; atq; aura piorum,
Qui peccasse dolent, promissæ & fidere gaudent
Iusticiæ, miseris quæ sponte offertur in illo
Qui patris est & imago sui, & sapientia summa.
Ergo etiã hæc pater. hoc ipso discetis ab usu
Esse mihi sedem sacrosanctæ in monte Sionis,
Monte meo, dulci qui uos amplectitur umbra,
Dux ego uester ero, atq; adero quæcunq; cadet fors,
Non ego destituam te dilectissime cœtus,
In quo nota mei uox, & reuerentia verbi,
Me nouit, celebratq; Deum, mihi militat vni.
Integra tunc Solymis accedet gloria templis,
Et cœlo cognatus honor, iam lata triumpho,
Sancta fide, afflatu diuini sancta fauoris,

*Ecclesia Sæcla
Catholica.*

Electos

Electos animis iunget communio ciues,
Præstabitq; Deo uerum cultumq; timoremq;
Edocta in terris consortia uiuere cœli.
Tunc tibi non aliquis sese ingeret aduena, cultus
Discolor externo, aut ficto sermone disertus,
Cessabit uarios mentiri lingua colores,
Non locus ullus erit sceleri, non gratia noxæ,
Non fraudem delusa dolo doctrina sonabit,
Vna eademq; pijs uox mentibus, una uoluntas,
Omnibus una fides erit, atq; amor omnibus idem.

Hæc ubi sic Horis ueniet foelicibus ætas,
Stillabunt dulces altis de montibus uuæ
Nectareos latices, atq; ambrosios thesauros,
Lacte fluent colles, atq; omnes undiq; riuus
Per campos Iudææ tuos, pregnantia dulci
Flumine, miratis implebunt littora terris.
Ecq; domo Domini læta scaturigine uiuus
Fons saliet, dulci loca late arentia riuo
Humectans, unde ægra sitim restinguere, & omnem
Pectora fissa Deo, poterunt abstergere labem,
Quacuncq; extremas sitiens gens accolit oras.

At rudis Aegyptus, semperq; rebellis Idume,
Et quicuncq; Deum soliti irritare nocendo,
Adflixere pios, hi pro leuitate uicissim
Persoluent pœnas, quoniam Israhelitida gentem
Sanguine foedarunt, nil unquam tale merentem,

Damna

Amplificatio
fructus Euangelijs.

Baptismus.

Pœna persecutorum.

Damna sua abiecti loca peruastata dolebunt
Dispersi exilio, naturæq; ultima passi
Tristibus ærumnis, serisq; doloribus ægri.

Tunc Synagoga furens, nimium confusa sciendo,

*Pœna Synago
e.
Misfaym
edom.*

Causa pijs luctus, & fusi sanguinis author,

Impia turbatrix verbi cœlesti sonantis

Præsidium miseris, meritis directa ruinis

Corruet excidio, petulante quod ausa furore

Immeriti fædo maculauit sanguine Iudæ

Progeniem infontem. Tua sed pie Iuda manebit

Posteritas, inuicta malis, tua salua manebit

Gloria, Sancta Sahim, nullo debilis æuo,

Donec summa dies, atq; ultima linea rerum

Atteret extincto pereuntem tempore mundum,

Et noua iam magnis procedere mensibus ætas

Incipiet, veræ texens primordia vitæ,

Ante Deum æterno semper pulcherrima cursu.

Temporis interea illorum me uindice sanguis

Non impune cadet, quorum mihi perstitit vni

Fixa fides, quamuis fors aspera uentilet ægros,

Excipiantq; uiæ plenis uel mille periclis,

Ipse adero medio tamen in discrimine pressis,

E tenebris lucebo Deus, e turbine uincam,

Et coetum seruabo meum, dextraq; tuebor.

Hoc caput est, memores huic dicto aduertite mentes,

Ipse Sionæa sedem sibi legit in arce,

Rex

Rex Deus omnipotens Rerum dominator & autor,
Hanc colit, hanc habitat, nusquam auersatus, & omni
Parte fouet praesens, omniq; tuebitur æuo.

*Epiphonema
de conseruatione
Ecclēsie.*

FINIS.

I O A N N I S

STIGELII PRAECATIONVM LIBER
PRIMVS.

PRECES CHRISTIANAE ORATIONIS DOMINICAE.

Q Vam Deus orandi seriem, quos approbet usus,
Hinc tecum incipiam puerili exponere uersu,
Chare mihi arcana coeli ratione, Philippe,
Cui pater, afflictæ Camerarius Hellados ingens
Gloria & assertor, Graiæ dum munera linguae
Ingenti studio Germanis seruat in oris.

E

Ergo

Ergo age siue diem Musis Aurora reducit,
Siue quies rerum tenebris humentibus orbem
Nox tegit, & placidos affectant membra sopores,
Seu loca sacra petis, patrias siue inter oliuas
Diuino accedis cumulatam munere mensas,
Has animo praesente preces, haec debita uota
Redde Deo, explicitis orans ad sidera palmis.

Has tibi corde preces Deus optime max. fundo,
Tempore in extremo, dubio in discrimine mundi,
Impia dum Geticum sumens in foedera cornu
Bestia, sic ueteris stimulante furore Draconis
Exitium mundo molitur, & omnia turbat.
Hei quam parua manus, numerusque paruus eorum est,
Ex animo cupiunt qui fratrem agnoscere Christum,
Teque patris coluisse loco. Sed respice partem
Hanc quamcumque tuam, tua qui sacra uerba professi
Esse tui cupimus, nisi mens uiciosa repugnet,
Illa quidem antiquam iam pridem ab origine labem
Pressa trahens, oculis quaedam uestigia cernit
Mandati ueneranda tui, Sed uiribus impar
Necquicquam propria uirtute placere laborat.
At tu summe Deus, fons rerum & dulcis origo,
Mens aeterna, potens, sapiens, sola omnia praestans,
Omnibus in rebus cuius uestigia monstrat
Autoris natura memor, qui solus & unus
Omnia perpetua dominus ratione gubernas,

Quae

Quæ cœlum quæ terra tenet, qui conscia fati
Consentire iubes terrenis sydera rebus,
Ne casu soluatur opus. Qui tempora certis
Distinguis uicibus, facis omnia, & omnia seruas.
Tu nos degeneres uultu miseratus amico
A nobis audire pater dignaris, & orbi
Sponte tuum mittis fraterna in fœdera natum
Abluat ut sordes nostras, & crimina tollat,
Et reddat merita dulcem pro morte salutem.

Da pater ut possim te uero agnoscere cultu
Et nomen celebrare tuum, ueroq; timore
Te patrem sentire Deum. Da gloria sicut
Sancta tua est per se, sic uero semper honore
Luceat in nobis, tua qui nos membra fatemur.
Ne leuis ambitio, ne uani gloria mundi
Transuersos rapiat, rebus sed in omnibus uni
Semper honos nomenq; tibi laudesq; ferantur.
Impia corrupti cedant uestigia cultus,
Stultaq; fictilibus fidens reuerentia diuis,
Et pietas omnis fucatæ conscia curæ,
Me nutu dignare tuo, ne forte recusem
Imperio parere tuo, tua iura ueteri.

PERge tuum late populis extendere regnum,
In quo non strepitus pomposæ splendidus aulae,
Non aurum, non arma sonant, non quidquid inerti
Blanditur mundo, fucosq; arridet inani.

E ij

Sed

Sed colit unanimis regem concordia Christum,
Propagatq; pios simplex Ecclesia cultus
Angelicis adiuta choris. Dā nescia frangi
Pectora, da uires animis tua dona professis.
Et flammis accende tuis, ut fortiter ausi
Vera repugnantī inculcent tua dogmata mundo.
Insidias prohibe sathanæ, compesce tyrannos,
Atq; suum turbam turpi quæ squalida luto
In gemmas ruit ecce tuas. dele omnia uitæ
Exempla impuræ, sacra cordibus instrue templa
Quæ resonent Christi noctesq; diesq; triumphos,
Expectentq; simul rediturum, atq; omnia mundi
Censurum scelera, & meritis noua regna daturum.

ET quoniam affectus nobis natura reliquit
Principio corrupta malos, nec nostra uoluntas
Per se grata tibi est, semper contraria coelo
Et uerbo aduersata tuo: tua sancta uoluntas
Nos regat, & facto primum spectetur in omni.
Fac nihil incipiam, nisi quod confidere possim.
Ante tibi placitum, dignumq; fauore uideri,
Sint tibi sacra Deus cunctarum exordia rerum
Euentusq; simul, qui primum exordia rebus
Principio ipse carens fecisti, atq; omnibus idem
Das finem, qui fine cares. Da uincere morbos
Hærentes animis, læsæ & contagia mentis.
Dā uelut agnoscunt tua iussa, tremuntq; uerendum

Impe-

Imperium unanimes, & sanctum numen adorant
Qui sociata colunt cœli commercia ciues,
Siue chori angelici, siue e tellure recepti,
Sic quoq; nos misera mundi qui in ualle tenemur
Spemq; animis alimus cœli, regniq; paterni
In te compositi unanimes uiuamus, & uno
Consensu tua uerba pij, tua iussa colamus.
Omnibus in te sit pietas, amor omnibus idem.

DA pater hæc etiam uitæ quorum indiget usus,
Dimensum da cuiq; suum, quo corpus alatur.
Qui uolucres pascis magnum per inane uolantes.
Qui flores etiam decoras, & lilia campi.
Hei pereant, quos urget amor sceleratus habendi,
Quos iuuat artifici passim ditescere fraude,
Qui specie sua furta tegunt, alijsq; rapaces
Inuigilant opibus quam quas Deus omnib. offert.
Da uictum nos posse tuo sperare fauore
Officij memores, iussos præstare labores,
Et curam mandare tibi, tibi reddere grates.
Hoc etiam ex animo petimus, da libera uerbo
Incrementa tuo, da qui sincera professi
Dogmata nos doceant, rectaq; ad sidera ducant.
Ipse magistratus præsens tua munera serua,
Iustitiæq; illis, ueræ & pietatis amorem
Inspira. placidæ da nobis tempora pacis,
Ut uigeant artes de te instrumenta docendi.

EN Deū infecti peccantis ab ubere matris
Quotidie iustam nos te irritamus ad iram,
Respice nos bonitate tua, qui mitis in omnes
Et solem, & pluuias iustisq; malisq; ministras,
Nostra trahens quoties ueteris contagia culpæ
Deficit a recto studijs mens lapsa sinistris,
Degeneris miserere Deus, succurre labanti,
Affectus compesce malos, siue ira furorem
Præcipitat, roditq; niger præcordia sanguis,
Seu dolor inuidiæ, seu nos uindicta lacessit,
Siue odio ardentem ferimur, seu dira libido
Ingenium a uero cœpta in contraria uersat.
Da ueniam miseris, nec noxam iure coerce.
Quod si ex iure manu consertum poscere mens est,
Nos caussa cadere, & longe ante perire necesse est.
Ignoscas miseris, ut nos ignoscimus illis
A quibus offensus nobis iniuria facta est.
Hei nimium meritæ securi in tempora pœnæ,
Quorum sunt ueniam præcordia claustra precanti,
Ille suis ueniam nec quidquam erroribus orat,
In quem sic hebetis cadit obduratio mentis
Nesciat ut læsus lædenti ignoscere culpam.
Hanc Deus o procul hinc dignere auertere pestem,
Da ueniam danti ueniam, neue amplius erret
Corruptæ uicium dignere extinguere mentis.

ECCE cateruatim nos vndiq; & undiq; tentat

Insidijs

Insidijs coluber, primum non passus Adamum
Conditione frui quam te donante tenebat.
Quos non ille dolos, quas non excogitat artes?
Ut genus humanum tenebris inuoluat, & omnem
Eripiat lucem miseris, & numina uerbi
Noticiamq; tui, quæ non incendia miscet:
Quas scelerum causas non inuenit: ille rapinas
Ille mouet lites, pestes, homicidia, morbos.
Ut lupus esuriens, uentris stimulante dolore
Per nemora & saltus, per flumina, iugera, rupes
Sæuus abit, ponitq; uago uestigia lustris,
Donec oues tandem pleno deprendit ouili.
Tum furor exacuit dentes, & duplicat iram,
Irruit in numerum grassator & omnia turbat,
Sic, si immane licet paruo componere monstrum
Spiritus immundus mille ingeniosus ad artes,
Mille opifex fraudum, scelerumq; magister & autor,
In nos grassatur, tua qui mandata professi
Te colimus natumq; tuum, numenq; fatemur,
In prædamq; inhiat, uoluit caligine mentes,
Seducitq; homines non hæc ad munera factos.
Hic uires effunde tuas, hic pectora firma,
Angelicas hic excubias, hic fulmina uerbi
Certa tui largire Deus, quibus obruat hostem
In te nostra fides, & uinci nescia uirtus.
Non ego dura pati discrimina mille recuso,

Dum

Dum tua constanti tueor mandata labore,
Sed ne deficiam, ne sæuo uincar ab hoste,
Tu mihi præsto ueni, tu suffice robora presso.
DENIq; ab aduersis nos eripe & assere rebus
Omnib. huius habet series quas impia mundi.
Nos nutu defende tuo, seu nominis hostis
Degener ille tui mendax homicidæq; mentes
Obruit insidijs, scelerumq; in retia uersat.
Seu nos sollicitat pietati inimica tyrannis.
Ecce fremunt, & bella petunt funesta tyranni,
Inuisum quibus est fidei & damnabile nomen,
Qui faciunt turpes uera e pietate cothurnos
Quando libet, soloq; colunt tua dogmata furo,
Ecce ruit, foedatq; tuas sus horrida gemmas.
Illa infanda, procax, meretrix Babilonica, coniunx
Horrendi sathanæ, cui septem guttura pendent
Et totidem capita, hei diris suffusa uenenis
Monstrum immane, ingens, pietatis lumine cassum,
Quodq; sua mundo mouet impietate stuporem.
Hei quas hoc furias secum trahit: omnia diro
Qua uenit infestat uicio, labemq; nephandam
Euomit, infestum spirans ad sydera uirus.
Tu tamen hic aliquem pateris Deus optime talem
Quicq; tuo e populis de nato dogmata tollit,
Quicq; ferox animo sanctos sibi sumit honores
Qui tibi debentur, falsoq; superbit honore?

Seq

Seqꝫ supra reges extollit & omnia mundi
Imperia, & fastu tumidus late omnia complet,
Vnanimorupto diuellens foedere reges,
Inspiratqꝫ illis rabiem, mortisqꝫ furorem,
Orbis & afflicti rabido sitit ore cruorem,
Imperio infestus, pacis uiolator & hostis.
Illius insidias, funestamqꝫ illius iram
Blasphemæqꝫ dolos linguæ, technasqꝫ nocentes,
A nobis te iuste Deus profitentibus arce.
Aut sua cum tandem mors iura nouissima poscet,
Deuicto hoc monstro, superato Dæmone, & omni
Curarum ingluuie, da mollem in funera somnum.
Composito da fine mori, membriscqꝫ solutus
Fac reddam patrio uitæ spiracula cœlo.

Talia vel certe non his diuersa Philippe
Orandus Deus est, saluantis nomine Christi,
Diuina æterna genitum quem mente voluntas
Donauit terris, ut pondera tanta subiret
Humanæ noxæ, perituri & crimina mundi
Ablueret, non ipse nocens, non ipse piandus.
Tantæ molis erat lapsam reparare salutem.
Ille igitur mortis domitor, uitæqꝫ redemptor
Ad patrem assistens æquali numine, nouit
Qua miseri careamus ope, qua mole premamur.
Ille intercedens offensum crimine nostro
Conciliat placatqꝫ patrem, nil denegat illi

F

Per

Per quem cuncta facit, Deus & pater ipse creator,
O quicumq; cupis traducere molliter æuum
Menteq; tranquilla cœlestem accedere uitam,
Fide Deo, & contra mundum seruentius ito.
Orandi studium ne desere, fungere iusso
Officio, feret hæc plenos tibi regula fructus.

ORATIO DOMINICA
IAMBICO DIMETRO.

DEus sator mortalium
Terræ potens & siderum,
Qui mitis in nos asperos,
Grauiſq; culpæ conſcios,
Gaudes patris vocabulo,
Nutuq; ſeruas omnia.
Fac innotescat omnibus
Nomen tuum mortalibus,
Verbi tui ſuauiſſima
Sic inſtruat nos gratia,
Vt te colamus vnicum
Sicut iubet per filium.
Accende mentes lumine,
Tuiq; regni imagine,

Vt in

Vt inchoent hic aurea
Vitæ perennis sæcula.
Regno tuo nocentium
Infringe vires hostium.
Fac nostra semper ut tuis
Mens acquiescat legibus,
Consentiat cum cœlica
Terrena pax concordia,
Iussum ministret mens opus,
Curæ tibi sit exitus,
Dum congregatim viuimus,
Largire nobis quæsumus
Externa vitæ commoda
Quibus uigent commercia,
Agnoscat ista charitas
Agatq; uere gratias.
Ignosce noxam fontibus
Culpæq; uim dolentibus,
Delicta si nos hostibus
Non asperi remittimus,
Da poenitere mens queat
Vt te iuuantem sentiat.
Nusquam sinas nos obrui
Draconis astu perditū,
Captos sed hostis artibus,
Tuis tuere viribus,

F n

Fac

Fac militemus strenue
Et compotes uictoriae.
Nos adferas ab omnibus
Calamitatum casibus,
Ducemq; mentem corporis
Ex mole duri carceris
Cum postulabunt tempora
Hinc transferas ad sydera.
AMEN.

PRECES MATVTINAE

OMnipotens, æterne Deus, mens edita nullo
Principio, mens fine carens, mens omnia cōplens,
Omnia quæ uerbo motum spirante creasti.
Alme pater, triplici simplex in numine numen,
Qui culpam humanam, & casum miseratus acerbum
Mente tua genitum Christum, cordisq; paterni
Effigiem, misero placide largitus es orbi,
Vt Deus accipiens humani corporis artus
Victima pro nostra caderet non noxia culpa,
Illum etenim mittens cœlesti uoce dedisti
Signa animi manifesta tui cum clanguit æther,
Hunc audite, mihi dilectus filius hic est,
In quo læticia est, in quo mihi sancta uoluptas,
Sancte Deus, sapiens, fortis mitissime Iudex,

Caste

Castè, potens, liber, qui præstas omnia solus,
Vt tua non aliquem bonitas habet inclyta finem,
Sic precibus sis præsto meis. En omnia culpæ
Agnosco monumenta meæ, pœnasq; pauesco,
Et doleo peccasse miser, cupioq; renasci.
Respice me miserum, culpam miserere fatentis,
Tu siquidem es uiua miseris sic uoce locutus,
Viuo ego uiuo Deus, lapsi non expeto mortem
Sed volo conuersum salua respiscere uita.
Quin etiam ille tuus, qui tecum tantus & idem,
Prostrator mortis Christus, mitisq; Sacerdos,
Per nomen tua dona suum nos poscere iussit.
Hunc propter miserere mei, mea pectora purga
Vi spirante tua, labemq; absterge nocentem,
Vt sint pura tui templa & domicilia uerbi.
Tum linguam regere atq; animum dignare uagantem,
Ne uelit illa loqui, tua quod diuina uoluntas
Non probet, & meritam quod te succendat in iram,
Neue hic degeneris securus in otia uitæ
Lapsus, ab angusto deflectat tramite uerî.
Collige, redde, foue, rege, respice, flecte, gubernâ.
Exiguum hunc cœtum, qui uero agnoscere cultu
Te didicit, natumq; tuum ceu debet honorat.
Hæc etiam studia & dextras quas discimus artes
Fac tueare Deus, quibus instrumenta docendi
Perficit, & leges uiuendi suppetit usus.

Inde tuum uerbum recte tractare facultas,
Inde tibi æternas resonans Ecclesia laudes.
Gaude animæ uis tota meæ, mihi præbuit aures
Qui nescit duro fidentem fallere uultu.
Iamq; opus incepto mihi rideat omne labore,
Totaq; lux abeat faustis foeliciter horis.

ALIAE PRECES
CARMINE ELEGIAÇO.

CONditor o rerum, rerum seruator ab æuo,
Extra quem non est ullus ubiq; Deus.
Quod redeunte fruar post actas luce tenebras,
Gaudeo, & agnosco munus id esse tuum.
Tu genus humanum primum sine labe creasti,
Vt sancte uultus uiueret ante tuos.
Quam male desciuit, quam turpiter excidit illud:
In mortem propria dum leuitate ruit.
At bonus es solus, iustamq; uis concipis iram,
Sic illam patria pro pietate premis.
Ergo admiranda natum pietate dedisti
Innocuus nostrum ferret ut ille scelus.
Qui percussa fuit pro nostra uictima culpa,
Et uetus a nobis abluuit omne nephas.
Ingentes igitur toto tibi pectore grates.

Perpe-

Perpetuus doni debitor huius, ago:
Teq; precor supplex dilecti nomine nati,
Me rege, me totum numine flecte tuo:
Auspice principium te spectet, & auspice finem,
Quicquid agam, uitæ dirige cepta meæ.
Ipse magistratus etiam, coetusq; piorum,
Ut tua conferuent dogmata sancta, rege,
Da pacem uictumq; tuis, compesce tyrannos,
Ut maneat uerbi gloria iusta tui,
Hac ego spe fretus, quod uitæ postulat usus,
Suscepti aggredior dulce laboris onus.

PRECATIO VESPERTINA

IAm mea declino nocturno lumina somno,
Omnia mox rigido membra sopore premar.
Nec scio num possim redituram cernere lucem,
An mihi sit somni mors obeunda soror,
Sed tibi summe Deus, Deus inuictissime grates,
Quas toto possum pectore gratus ago.
Incolumem qui me voluisti hac luce tueri,
Ne vitam premerent vlla pericla meam.
Quicq; repressisti grassantis dæmonis iram,
Qui rabido populos circuit ore tuos.

Nunc

Nunc quoqꝫ dum iaceo ueluti morientis imago,
Mi Deus, hæc nutu membra tuere tuo.
Ne lasciua meos perturbent somnia sensus,
Organa tu mentis dirige crassa meæ.
Fac tuus immanem procul angelus arceat hostem,
Cui proprium est regni lædere membra tui.
Crastina sic cernens redeuntis tempora lucis,
Grata tibi memori carmina mente canam.
Iam cessent curæ, placidi requiescite sensus,
Tu mihi iam Christo somne fauente ueni.

PRECATIO PRO EC-
CLESIA DEI EX VERBIS
Esaïæ, Cap. LXIII.

CONDITOR o cœli, subiecti conditor orbis,
Ante creata Deus, sine origine uiuus & vnus
Fine carens, solusqꝫ potens, atqꝫ omnia præstans,
Qui pater es, gaudescqꝫ patris pietate probari,
Qui patrio fidi gentem Israelis amore
Ipse gubernasti, Pharij cum tela Tyranni
Effugeret, medias illæsa per æquoris undas.
Tuqꝫ patris fili, diuinæ mentis imago,
Christe Deus, miseris sed homo dignate uocari,
Dum mortem meritis preciosa morte salutem

Et ui-

Et uitam reddis , Mediator & optime testis
Ante patrem ueniæ , patria qui mente uerendus
Ceu dextra trepidum comprehendens uindice Mosen
Agmina Erythræas duxisti tuta per undas,
Stante graui ceu mole freto , ponentibus Euris,
Et siccis pedibus populo calcante profundum.
Tuq; patris natiq; simul spirabile numen,
Quod mentes hominum diuino accendis amore,
Pectoraq; instauras , & uires cordibus addis,
Spiritus alme , tuo populis qui robora flatu
Aspirans , motus faciles , uiresq; dedisti,
Cum uada purpurei penetrarent inuia ponti,
Et similes starent æternis rupibus undæ,
Impiaq; immanem fallens audacia regem
Arma uirosq; imi raptaret gurgite fundi,
Hoc etiam summo miseri in discrimine mundi
Parua sub ingenti dum pressa Ecclesia motu
Fluctuat, & regum manifestam sustinet iram
Summe pater mentes populiq; ducumq; gubernas,
Nate potens agmen positæ dux eripe fraudi,
Spiritus adflatu da motum , & suffice uires.
O æterne Deus , dux unice , & unice uictor,
Affer opem tanto quassatis turbine rebus,
Et caussam defende tuam , tua gloria uincat,
Dum tua sincere populo mandata professo
Non unus Phraeo ferrum minitatur & undas,

G

Da uis

Da uires animis, da nescia pectora frangi,
Arma fide superare doce, pietate tumultus,
Vt queat insanis Ecclesia pressa Tyrannis
Impositum perferre iugum, uictrixq; ferendo
Pace colens aliqua diuini oracula uerbi
In patriam, sæui reuocare catharmata mundi,
Et tandem ad coelum spretis euadere terris
Ante patrem æternum Christo ducente triumphum.

DE VI ET EFFICA CIA ORATIONIS.

Quisquis in hoc vario vitam discrimine rerum
Carnifici lugens hospes in orbe trahis:
Si modo non animum despondes, si modo vero
Agnosces gemitu numina uera colis,
Nulla adeo est atrox ullo uiolentia casu,
Quæ rebus ueniat pernitiōsa tuis.
Fide Deo, & contra fortunam audentior ibis,
Omnibus oppressos liberat ille malis.
Quid q; & inuitat? quid quod sese omnibus offert?
Et patrio cunctos motus amore uocat?
Quisquis in aduersi iactaris turbine fati,
Et male difficili tempore pressus habes,
Ad mea suspira sublato numina corde,
Ipse tibi præsto tutor & ultor ero,

Ipse

Ipse ego te creptum medijs seruabo periclis,
Omnibus arumnis, me duce, liber eris,
Sic ait, aquæui facunda per organa flatus
Ipse boni & ueri fons & origo Deus.
Quæ uox? q̄ harmonicis chelis argutissima neruis,
Quis sonus hoc poterat dulcior esse sono?
Ecce cruoriuori premeris sub lege Tyranni,
Vincula uel sæuo captus ab hoste geris,
Aut tibi ieiunas stringit penuria mensas,
Aut uastat patriam pestis acerba domum,
Aut mensuræ expers, immanis bellua, bellum
In tua non merita tegmina clade ruit:
Aut tibi subiectæ tollunt bona patria flammæ,
Impius aut partas miles ademit opes,
Protinus auxilium, solatia, robur habebis
Orabis puro si modo corde Deum.
Dum loca bis quatuor Moses per inhospita lustris
Iusta Deo addicto milite bella gerit,
A populo quoties pœnam ruditate merenti
Deflexit precibus dira pericla suis?
Angelus Achacidæ precibus legatus in hostem
Agmina diuina delet iniqua manu:
Fauce siti pressa precibus fortissime Samson
Es subiti puras fontis adeptus aquas.
Obruit ignita tres in fornace precantes,
Sæua sed illæfos perdere flamma nequit.

Asseruere preces saeuorum ex ore leonum
Innocuum vatem Mede Darie tuum,
Saphatidi Syriæ nec quicquam vincla Tyrannus,
Dum facit is puro pectore vota, parat.
Liberat e Cete fidentem oratio Ionam,
Dum firmo in medijs pectore fidit aquis.
Per mare iactatus, terræq; pericula Paulus
Ad dominum fusa vincit vbiq; prece.
Fracta cadunt manibus confiso vincula Petro,
Dum læto auxilium predicat ore Dei.
Quid tamen exemplis opus est? exempla petenti
Quælibet ostendit milia multa dies.
Nonne Deus nobis mensas spectantibus auget?
Consecrat adpositas cum pia lingua dapes.
Nōne hominū numerus sata grana æquare videtur
Quæ pius agricolæ misit in arua labor?
Plena tamen mire distendunt horrea messes,
Præsentemq; docet copia larga Deum.
Quod si idem fieri Geticæ caussabere genti,
Aut si qua est alibi gens aliena Deo,
Næ data præsentis dum carpit commoda vitæ
Ante Deum æternis est caritura bonis,
Vt casta uult mente coli, precibusq; vocari,
Sic negat oranti munera nulla Deus.
Tu modo ne tempus votis prescribere vocato,
Sæpe Deus differt, quæ cito facta nocent.

Ipsi

Ipsi tota tuæ ratio est notissima vitæ,
Arbitrium voti finiet ipse tui.
Nec peregrinanti uox irrita mente feratur,
Nec sonet ignaro pectore lingua preces.
Heu cæcos animis, suæq; in mala sponte ruentes
Quos res a memori distrahit ulla prece.
Aut qui dum fuses, sic re cogente, precantur,
Tam sanctam trepidi rem dubitanter agunt.
Ethnicus ignotis sic diuis concinit Orpheus,
Sic hymnos dubio ludis Homere sono.
Vox cõcors cum corde sonet, mens pura precetur,
Et ueniam in solo quærat, opemq; Deo.
Mens humilis, culpæq; dolens, fidentisq; salutis,
Ardua perruptis nubibus astra subit,
Per mediatorem firmans vestigia Christum,
Non aliter compos, quod cupit, illa feret,
Ipse Deus præsto est, & proximus omnibus illis,
Qui uera faciunt agnitione preces.
Illum adeo vero quicumq; verentur amore,
Omnia gauisi, quæ uoluere, ferent.
Vt se saluifici patefecit munere uerbi,
Sic sibi uult proprio solus honore coli,
Nec cultum agnoscit, quem Christi gloria nescit,
Illius oratus nomine cuncta dabit.
Ergo suis subeat sua fata furoribus orbis,
Quem iuuat a uero semper abesse Deo.

Cladibus inuoluant insanæ hæc tempora mentes
Omne ausit regni dira cupido nefas,
Te pater inuicti sacro cum numine Christi,
Mente fide plena te voco viue Deus.
Qui te saluifici manifesto munere uerbi
Perspectum populis omnibus esse cupis.
Et uelut e speculo, tua quæ sit uera voluntas
Præcipis e gnati discere morte tui.
A te uera salus, tu tanto in turbine rerum
Auxilio serua meq; meosq; tuo,
Neue animum rapiat secum sentina malorum,
Da mala pacata publica mente pati:
Ecce caput diro pugnat cum corpore fato,
Et rapit infantes sæuus in arma furor.
Paruulus ista tuus trepide grex prælia spectat,
Et fieri in pœnas talia cuncta dolet.
Heu multos belli uis impia raptat eorum,
Qui ferro certe non meruere mori.
Vt yolitans rupto violentus ab aggere torrens.
Cum pecore innocuas flumine tollit oues:
Sic late extendens crudelia brachia bellum
Versat in innocuas publica damna domos.
Ah quam sancta tui scædatur gloria uerbi,
Dum dictu mauors facta nefanda facit,
Aure Deus placida gemitus admitte tuorum,
Et dubijs certa consule rebus ope,

Obiectas

Obiectas arce nebulas , & nubila pelle
Quæ uerbo inducit vis manifesta tuo,
Impia mordaces conantibus iniice frenos,
Nominis extinguant ne monumenta tui
Ne cogant propriam nos abiurare salutem,
Quæ sola gnati morte parata tui est.
Sed tu iam Christi famulatrix musa potentis,
Siste querelofum, sineq; claude melos.
Cor sine spe plenū expectet, quod lingua precatur,
Sic Deus oblato munere largus adest.
Fisa Deo cupidum firmet patientia pectus,
Omne malum in Christo , si patiare, leue est,
Christe potens mundi domitor , rex maxime regū
Auxilio foueas meq; meosq; tuo.
Tu potes in medio pacem donare tumultu,
Vt nusquam mentis sentiat arma quies.
Naufraga delirans subeat sua tempora mundus,
Sacra mihi præsens anchora Christus erit.
Hoc duce sæuorum pelagus superabo malorum,
Iam valeat mundus, Tu mihi Christe faue.

PRECATIO REGIS
IOSAPHAT EX LIB: II
PARALIPOMEN:
Cap: XX.

Dum

Dum nos aucta malis miseros atrocibus urgent
Tempora plena dolis, tempora plena minis,
Siue manet pressis dñi uiolentia belli,
Quæq; abolet pacis vis inimica decus,
Seu crudele grauat falsa nos lege tribunal,
Damnat & immeritos vox uiolenta reos,
Siue lues attris exurit febribus artus,
Seu terit exanguis uiscera sicca fames,
Mitis ab his terris gemitus pater accipe nostros
Mandati sonuit vox ubi clara tui.
Hic quoniam largo tua gratia munere fulsit,
Factaq; per nomen vota fuere tuum.
Da Deus in te vnum sincero pectore fixi
Intrepide faciem stemus ut ante tuam,
Et nisi nos merita tua gratia deferat ira,
Stabimus, inq; tua uora feremus ope,
Fundemusq; preces fido clamore sonantes,
Vt tanti auertas tristia fata mali.
Et tu respicies miseros, dubijsq; benignam,
Rebus opem, patria pro pietate, feres.
Ecce dies & tempus adest, quo feruidus hostis
Irruit, & ferro uiscera nostra petit,
Deleat ut grata pulsos e sede colonos,
Munere, quam tenuit nostra propago, tuo.
Ne paciare Deus grassari impune Tyrannos,
In nomen ducunt qui fera bella tuum.

Et quia

Et quia tanta nequit nostro uis Marte retundi,
Et superat nostras copia tanta manus.
Dum mens nostra graui caligine mersa laborat,
Nec bene quid deceat pectora cæca uident,
Ad te oculos fixos fida cum mente leuamus
Tu gemitus audi votaꝫ nostra Deus,
Tu rege conatus, tu robora mentibus adde,
Vt tibi quod facimus omne probetur opus,

LOCVS ESAIAE XLIX

O Re Sion querulo sic est formosa loquuta
Cum quærente Deum mœsta pauore foret,
Ergo reliquisti me tot mala dura ferentem
Et memor afflictæ non es ut ante Deus?
Huic Deus. An poterit curam deponere prolis,
Vlla parens partum non miserata suum?
Si tam dura tamen tamꝫ implacabilis ulla est,
Vt possit sobolis non meminisse suæ,
Ipse tui nunꝫ mutabo oblitus amorem,
Tu dilecta mihi filia semper eris,
Ecce manu descripta mea tua moenia seruo
Vt firma incolumem te statione tegam,
Ecce oculis te gesto meis mihi cuncta uidenti,
Proxima ceu nunc es, proxima semper eris.

H  Carmen

CARMEN SAPHIR
CVM PRO REMIS
SIONE PECCA-
TORVM.

Mollibus nati pater ut labellis
Moscum figens animum calentem
Pandit, & dulcem simul afflat alti

Cordis amorem;

Sic tuam in Christo sobolem redemptam
Et foues mitis Deus, & paternæ
Mentis aspirans animam benigno

Numine seruas,

Illud, æternum patris atq; nati
Robur exercens, recreata uerbo
Erigit, fulcit, renouatq; sancto

Pectora motu.

Nescit humanum genus omne, nescit
Eloqui mundus tua quam sit ampla,
Et sinu terræ bonitas, & alto

Maior olympo.

Candide iuras, ego triste nolo
Funus errantis, redeat sed ultro
In uiam, & ueræ placido fruatur

Munere uitæ.

En ego

En ego infecta uiciofa matris
Vlcera, & sæui saniem Dracronis
Pertraho mecum, propriæq; merfus
Sordeo culpa.

Audlo sanctæ pia iussa legis,
Cæca sed torpet mihi mens, uoluntas
Frena formidat, tumido repugnat
Viscere pectus.

Et tamen riuos lachrimor fluentes,
Percitus uero quatiôr dolore
Pœnitet culpæ, ueniamq; toto
Pectore ploro.

Cede uirtutis sapientiæq;
Dignitas omnis, opera & labores
Factaq; Heroum, tumidæq; Regum
Cedite uires,

Tu mihi dextram pelago natanti
Porrigis, mortis domitor, tibiq;
Christe fidenti ueniam & salutem
Suggeris ultro,

Cum uoles ergo, moriar triumphans,
Et tuis hærens humeris beatæ,
Regna conscendam mihi parta vitæ,
Christe redemptor.

H ij

LOCVS

LOCVS ESAIAE LXV.

VT sua qui lustrat prudens vineta colonus
 Dum piger autumnus perdidit annus, opes,
 Cum videt intactum coelo, superesse racemum
 Unde queat musti pars quotacumque premi,
 Parcite ait famulis, prouentu nunc in illo est,
 Hinc aliquis uini sic quoque gustus erit.
 Sic ego qui uiua Deus omnia mente guberno
 Cui dolet humani causa pudenda mali,
 In morem Agricolae parcens, non omnia perdam,
 Iure tamen perdi quae potuere meo,
 Si quis adhuc restat, quamuis uiciosus & ager
 Propitio curae quem iuuat esse Deo,
 Hunc ego seruabo, raram ceu uisitor uiam,
 Perpetuo regni pars erit ille mei.

P R E C A T I O

Erhalt uns Herr bey deinem wort etc.

Serua Deus uerbum tuum,
 Et frange vires hostium,
 Qui Iesum filium suo
 Turbare conantur throno.

Ostende nunc potentiam
 O Christus rex regum tuum,

Defende

Defende paruulum gregem
Qui te fatetur principem.

Viuificator spiritus
Concordiam da cordibus,
Ades periclitantibus,
Cum morte conflictantibus,

ALIA

Da Deus lætæ bona sancta pacis,
Quæ vacet vitæ studijs honestæ
Debito semper tibi quæ timore
seruiat uni,

Pace fecundæ nutriuntur artes,
Et uigent urbes populique leges,
Omnis & uirtus pietasque uero
Clarat honore.

Ast ubi Mars est, ibi nil honesti,
Sed iacent leges, silent inter arma
Quicquid est sanctum, pietas & omnis
Languet honestas

ALIA

Adfere nos verbumque tuum Deus optime serua,
Et rabiem Turcæ pontificumque preme.
Qui tecum æquali regnantem scedere Christum
Conantur patrio præcipitare throno.

H in

Da pa.

Da pacem, defende tuos tibi semper ut omnis
Posteritas laudes hic & ubiq; canat,

DVO LOCI EX PSALMIS
PSALM: XXV INTEGRITAS
ET IVSTITIA CVSTO-
DIANT ME ETC.

PSALM: CXII BENE VIRO ISTI
QVI ADMINISTRAT NEGOTI-
A SVA IVSTE.

Sic nos hæc terit & fatigat ætas,
Vt sint plurima perferenda multis,
Qui culpa vacui ferunt nocentum
Pœnas immerito, dolentq; culpæ
Externæ graue, plumbeumq; pondus.
Ergo sit cynosura, & una semper
Nostræ regulæ nauigationis,
Verum nosse Deum, & pie vereri,
Mandatq; ducem professionis
Syncero officiij timere cultu:
Tum præsens tibi quicquid hora fortis
Aspergat sine stomacho libenter
Amplecti, & furiosa probra uulgi
Motis tradere distrahenda uentis,

Fœlix

Fœlix, & merito beatus idem;
Quem iuste iuuat exequi labores
Quoscuncq; officij decus requirit.
Non ille a strepitu sibi timebit
Famæ præstigijs tumultuantis,
Dum uel bella uagos mouent pauores.
Er serpunt hominum dolis politi
Rumores siliquis inaniores,
Vel fortuna rotam maligna vertens
Immutat bona, testaramq; frangit.
Illi cor stabile, & fide probatum,
Affixumq; Deo, benigna præstat
Synceræ documenta disciplinæ
A fūco procul & dolo remotum;
Præstat quod fieri pie necesse est,
Euentusq; Dei in sinum reponit:
Addit se comitem Deus per ipsas
Aerumnas patrio fauore lucens.
Hic vitæ modus est, hæc una summo
Virtus grata Deo: timere verum
Pura mente Deum, cauere morsus
Qui mentem sibi consciam perurunt,
Et plenīs alios iuuare uelis.
Sit dux integritas, comes sit huius
Quæ ius cuiq; suum benigna defert.
His alis iuuat e falo profundo

Emersum

Emeritum & pelago periculorum
In campos nitidi euolare coeli.

AD DICTVM CHRIS-
TI, QVAERITE PRIMUM
regnum coelorum etc,

Dilce Deum toto tenerari corde Iuuentus,
Illius & uero iussa timore sequi.
Cura sit inde tibi ciuilis proxima vitae,
In patriam, inq; homines quæ iubet esse pium
Sic tibi, quæ cupies, foeliciter omnia cedent,
Omne erit & duri dulce laboris onus.
Quære Deum primum, sic omnia diues habebis
Ante homines uoti compos & ante Deum.

PRECATIO AD DEVM
PATREM IN TEMPES-
tate fulminum.

Conditor rerum, sapiensq; rector
Vindicis nostri pater alme Christi,
Cuncta qui nutu patrioq; præsens
Numine complex,

Eniñ.

Densior fumis, gelidisq; nimbis,
Reddit incluso sonitum vapore,
Et Notho miscens tonitru sequaci
Fulminat aer.

Quis fragor? quonam ueniens Magistro
Maius humano imperium furore
Monstrat, & reges trepidos, & altas
Territat urbes?

Tu moues fulmen simul & coherces
Imperas uentis Deus, & gubernas
Quicquid & tellus, gremiumq; terræ
Sustinet aer,

E tuis actis homini negatis
Emicat virtus tua & altitudo,
Et tuam ex ipso ualidam notamus
Fulmine dextrant:

Vidimus Salam trepidi retortis
Rura forbentem violenter undis
Vidimus fusco semirupta telo
Tegmina lambi,

Sic pater proli ferulam merenti
Monstrat, ut uiso resipiscat ictu,
Signa commoti tremimus parentis,
Parce precamur.

I

Parce

Parce delictis, uicijſq; nostris
Duriſus, moderare pœnam,
Cæca uentofæ grauiter dolemus
Crimina culpæ.

Spiceis surgant ſegetes ariſtis,
Vinæ læto tumeant falerno,
Et tuæ teſtis bonitatis, omnis
Rideat hortus.

His bonis grato ſtudio vt fruamur,
Tu regas cœtus miſeros, tuiq;
Diuitem aſpires cupidis amoris
Cordibus auram.

Non agri tantum pabulo feracis
Viuiſus, verbo ſed & efficaci,
Quod tuo miſſum omnipotens Creator
Exit ab ore.

Vim tui verbi placide ſonantis
Hauriant aures, teneantq; mentes,
Et tibi, uiuo fidei facultas
Ferueat æſtu.

Da probos mores docili iuuentæ,
Da pijs Muſis generoſa pacis
Tempora, ut uero tibi uera conſtet
Gloria cultu.

DICTVM

DICTVM TERTVLLI
ANI. CRVOR SANCTO.
RVM SEMEN ECCLE
SIAE.

Hæc est ingenui natura arcana cruoris,
Impia quo sancti martyres arma lauant,
Plenius hoc Christi foelices irrigat hortos,
Quo uelut effuso largius imbre fluit.
Inde pijs animis Christumq; animosa professis,
Messe uenit surgens uberiore seges,
Dum mactare pios gaudet furiosa Tyrannis
Sæua pios etiam carnificina facit.

AD DICTVM CHRISTI.
NE SITIS SOLLICITI.
Matth: VI.

Quam sit præsidium humanum sine robore, & omni
Quæ timida a longe pectora firmet, ope,
Hic docet, hoc Sapiens arcano dogmate Christus,
Sollicitos homines dum uetat esse Deus.
Namq; pater, uigili qui prospicit omnia cura,
Fidentes alia nos ratione iuuat,

I ij

Mente

Mente Deo fisa , tu iusso munere fungi
 Afuesce , Euentum prouidus ille dabit.
Hoc illi proprium est soli, quod mundus, & omnis
 Ex sese , ut capiat , sculperere nescit homo.
Ille fidem occulto crescentem numine donans
 Auriferi similem fluminis esse facit.
Ergo fides animi CHRISTUM comprehendere docti,
 O homo , sit vitæ regula certa tuæ.
Nulla tibi deerunt sic gratæ commoda vitæ,
 Nam bona , quæ nescis, sponte dat ipse Deus.
Lilia qui nitidis regaliter ornat in hortis,
 Et decus ignaris floribus esse facit.
Ille bonis omni sibi succedentibus hora,
 Fidentem , patria te cumulabit ope.
Hoc supra captum est hominis, sed discere uocanti
 Fidere , sic omni tempore diues eris.

FINIS.

IENAE

Excudebat Christianus Roodinger.

ANNO SALVTIS

M. D. L. V.